

四庫全書

史部

# 欽定四庫全書

史部

山西通志卷一百二十四

詳校官給事中<sub>臣</sub>王鍾健

檢討<sub>臣</sub>德生覆勘

總校官進士<sub>臣</sub>朱鈴

校對官中書<sub>臣</sub>吳俊

謄錄監生<sub>臣</sub>羅翹遠

欽定四庫全書

山西通志卷一百二十四

人物

二十四

蒲州府

唐

張玄素蒲州虞鄉人仕隋景城縣戶曹竇建德執將殺之邑人千餘號泣請代曰此清吏殺之是無天也建德命釋縛署治書侍御史不拜聞江都信始為黃門

侍郎賤平授景州錄事參軍太宗問以政對曰萬乘之尊身決庶務日斷十事五不中中者信善有不如中者何若上賢右能使百司善職則高居深拱疇敢犯之隋末盜起皆保城邑以須有道聽命是欲背上怙亂者果鮮以陛下聖神跡所以危鑒所以亡日慎一日雖堯舜何以加上曰善拜侍御史遷給事中貞觀四年詔發卒治洛陽宮乾陽殿且東幸玄素上書曰臣惟秦始皇帝藉周之餘夷六國統壹尊將貽之

萬世而不克及子者殫嗜奔欲也天下不可以力勝  
唯當務儉約薄賦斂以身先之乃能大安今東都未  
有幸期前事土木戚王出藩又當營構科調繁仍失  
疲人望一不可也陛下向平東都會觀廣殿皆撤毀  
之天下翕然一口頌歌豈有初惡侈靡而後好雕麗  
哉二不可也陛下每言巡幸者不急之務徒為虛費  
今國儲無兼年又興別都之役以產怨讟三不可也  
百姓承亂離之後財賦殫空雖蒙更生意未完定奈

何營未幸之都重耗其力四不可也漢祖將都洛陽  
婁敬一言即日西駕非不知地土中道里所均但形  
勝不及關內弗敢康也伏惟陛下化凋敝之俗為日  
尚淺詎可東巡以搖人心五不可也臣嘗見隋家造  
殿伐木於豫章二千人挽一材以鐵為轂行不數里  
轂輒壞別數百人齎轂自隨終日行不三十里一材  
之費已數十萬工揆其餘可知已昔阿房成秦人散  
章華就楚衆離乾陽畢功隋人解體今民力未及隋

日而役殘創之人襲亡國弊臣恐其過甚於煬帝又  
曰臣聞東都始平太上皇詔宮室過度者焚之陛下  
謂瓦木可用請賜貧人事雖不從天下稱為盛德今  
復度而宮之是隋役又興不五六年間一捨一取天  
下謂何上顧房玄齡曰使後必往雖露坐庸何苦即  
詔罷役賜綵二百匹魏徵名鯁挺聞玄素言歎曰張  
公論事有回天之力可謂仁人之言哉歷太子少詹  
事遷右庶子時承乾事游畋不悅學玄素上書曰

孔穎達奉詔講勸宜數逮問不納又上書言孔穎達  
趙弘智皆宿德鉅髦兼識政機宜數召見騎射畋游  
褻戲酣歌不可以御上知數裁正承乾頻擢至銀青  
光祿大夫行左庶子承乾久不見賓友玄素曰今所  
見止婦人不知如樊姬等可益聖德者幾何若無之  
即便諛艷嬖何足顧哉上高署賢才為寮佐今乃不  
得進見將何以朝納誨夕補遺哉承乾諱其切夜遣  
戶奴以騎槓狙擊危脫死嘗聞擊鼓叩閤正言承乾



出鼓對玄素破之玄素不能已復上書極諫承乾怒遣刺客伺之會廢坐除名頃之召授潮州刺史徙鄧州高宗時致仕麟德初卒始玄素與孫伏伽在隋皆為令史太宗嘗問玄素官立所來深自羞汗褚遂良諫上曰朕亦悔之

呂子臧蒲州河東人剛直健於吏隋大業末為南陽郡丞捕擊盜賊有功高祖遣馬元規慰輯山南獨子臧堅守元規遣士諷曉子臧殺之及江都問至更使其

堦薛君倩齋詔諭之子臧發喪訖送款就拜鄧州刺史封南陽郡公武德初與元規捍朱粲元規兵不進子臧曰乘賊新敗上下惶沮一戰可擒若遷延其衆稍集吾食盡致死於我不可當也不納子臧請以所部兵獨進又不許俄而粲復張元規嬰城子臧扼腕曰謀不見用坐公死矣或勸其降子臧曰我天子方伯且降賊乎乃率麾下數百人赴敵死

薛大鼎字重臣蒲州汾陰人父粹隋介州長史坐漢王

諒遇害大鼎流辰州用戰功得還高祖兵興謁見龍  
門因說絕龍門軍永豐倉就食為拊背扼喉計高祖  
奇之時諸將策先攻河東故議置授大將軍府察非  
掾出為山南道副大使開屯田趙郡王孝恭討輔公  
祐以為饒州道軍師引兵渡彭蠡湖以功遷涪州刺  
史累徙滄州無棣渠久廢塞大鼎浚治屬之海商賈  
流行里民歌曰新溝通川楫利屬滄海魚鹽至昔徒  
行今騁駟美哉薛公德滂被又疏長蘆漳衡三渠泄

汧潦水不為害時鄭德本在瀛洲賈敦頤為冀州皆有治名故河北稱鎗脚刺史永徽中遷銀青光祿大夫行荊州大都督長史卒諡曰恭子克構有器識永隆初歷戶部郎中族人黃門侍郎顓弟紹尚太平公主克構曰室有傲婦善士所惡夫惟淑德以配君子無患可矣顓不敢沮而紹卒誅陳思忠居喪奪服客往弔辭以辰日不見克構曰事親者避嫌可也既孤矣則無不哭世服其言天授中遷麟臺監坐弟流沒

嶺南

柳楚賢蒲州虞鄉人莊孫大業中為河北縣長堯君素  
據郡楚賢說曰唐公名在圖籙動以誠信豪英景赴  
天所贊也君子見幾而作俟終日邪君素不從楚賢  
潛行自歸授侍御史貞觀中持節冊拜突厥辭其遺  
不受歷交桂二州都督杭州刺史皆有名

羅道琮蒲州虞鄉人慷慨尚節義貞觀末上書徙嶺表  
有同斤者死荆襄間臨終泣曰人生有死獨委骨異

壤邪道琮曰吾若還終不使君獨留此瘞路左去歲  
餘赦歸會霖潦積水失其殯處道琮慟諸野波中忽  
若湔沸者道琮曰若屍在可再沸祝已水復湧乃得  
屍負之還鄉尋擢明經仕至太學博士為時名儒

薛元超收子九歲襲爵長好學善屬文尚巢王女和靜  
縣主累授太子舍人高宗初遷給事中數陳當世得  
失納之轉中書舍人弘文館學士喪解起授黃門侍  
郎檢校太子左庶子薦任希古高智周郭正一王義

方孟利正鄭祖元鄧元挺崔融等皆以才自名累拜  
東臺侍郎請令李義府乘馬貶簡州刺史又坐上官  
儀戍雋州上元初還拜正諫大夫三年遷中書侍郎  
同中書門下三品上校獵溫泉奏諸蕃野心而使挾  
兵在圍中非所宜納之嘗宴召元超曰任卿中書寧  
藉多人俄拜中書令兼左庶子幸東都留輔太子監  
國手勅曰朕留卿若失一臂顧太子未習庶務關中  
事卿悉專之嘗諫太子曰內苑之地繚叢薄冒翳薈

絕磴險塗殿下截輕禽逐狡兔銜檠之變詎無可虞  
又戶奴竊發將何以禦天皇所賜書戒丁寧惟罷馳  
射之勞留情墳典豈不美歟上遣使厚賜慰其意時  
政出武后陽啗乞骸骨加金紫光祿大夫卒年六十  
二贈光祿大夫秦州都督陪葬乾陵子曜聖厯中官  
正諫大夫

趙叡冲虞鄉人隋平東將軍顯號之元孫博州刺史世  
立之曾孫唐監察御史君煦之孫號王府法曹叅軍



徵之子志行朗異以孝友聞天后時應明堂大禮科  
上異其對授陝縣尉轉平遙尉有治聲晉大理評事  
迫於祿養請署同州河西丞奸吏聞風逃竄郡縣胥  
資翊贊子良器良弼暨孫密邕薰復縱袞皆有宦蹟  
贈虢州刺史太常卿

張嘉貞字嘉貞本范陽舊姓高祖子吒仕隋河東郡丞  
遂為猗氏人以五經舉補平鄉尉免長安中御史張  
循憲使河東問吏曰若頗知有佳客乎吏以嘉貞對

循憲召見咨以事嘉貞條析理分莫不洗然循憲大驚試命草奏皆意所未及他日武后以為能循憲對皆嘉貞所為因請以官讓后召見內殿以簾自障嘉貞儀止秀偉奏對侃侃后異之因請曰臣草茅之人未覩朝廷儀今天威咫尺若隔雲霧恐君臣道未盡也后曰善詔上簾引拜監察御史擢循憲司勳郎中醕其得人累遷兵部員外郎時功狀盈几嘉貞為詳處不閱旬廷無稽牒進中書舍人歷梁秦二州都督

并州長史政以嚴辦吏下畏之入奏事元宗善其政  
數慰勞嘉貞言弟嘉祐為鄯部別駕願內徙命徙嘉  
祐忻州刺史突厥九姓新內屬雜處太原北請置天  
兵軍綏護其衆即以為天兵使明年入朝或告其反  
按無狀令坐告者嘉貞辭曰國之重兵利器皆在邊  
今告者一不當即罪之臣恐塞言路後無由聞天下  
事遂得減死上以為忠且許以相嘉貞因曰昔馬周  
起徒步謁人主血氣方壯太宗用之能盡其才甫五

十而歿向使用少晚則無及已陛下不以臣不肖必用之要及其時後衰無能為也上曰第往行召卿及宋璟等罷以為中書侍郎同中書門下平章事遷中書令居位三年善傳奏敏於裁遣與張說同相議論無所讓未幾嘉祐拜金吾將軍兄弟要近人頗憚媚上幸太原嘉祐坐事說誅嘉貞素服待罪不謁遂出為幽州刺史踰年為戶部尚書益州長史判都事明年坐善王守一貶台州刺史俄拜工部尚書為定州

刺史知北平軍事封河東侯及行上賦詩詔百官祖  
道上東門久之以疾丐還詔醫馳驛護視卒年六十  
四贈益州大都督諡曰恭肅嘉貞性簡疏與人不疑  
內曠如也嗜進者汲引之能以恩終始嘗薦中書舍  
人苗延嗣呂太一考功員外郎員嘉靜殿中侍御史  
崔訓皆位清要日與議政事故當時語曰令君四俊  
苗呂崔員始為舍人崔湜輕之後與議事正出其上  
湜驚曰此終其坐後十年而為中書令嘉貞雖貴不

立田園或勸之答曰吾嘗相國矣未死豈有饑寒憂  
若以譴去雖富田產猶不能有也引萬年主簿韓朝  
宗為御史卒後十餘歲朝宗以京兆尹見上曰陛下  
待宰相進退以禮子孫咸在廷張嘉貞晚一息寶符  
獨未官上惘然召拜左司禦率府兵曹叅軍賜名延  
賞

張嘉祐猗氏人嘉貞弟也有幹略嘉貞為相任右金吾  
衛將軍昆弟每上朝軒蓋騶導盈閭巷時號所居坊

曰鳴珂里後貶浦陽府折衝開元末為相州刺史立  
尉遲迴祠三歲入為左金吾將軍

暢瓘河東人鄉舉進士廓落有口辨好談王伯大略天  
寶末安祿山奏為河北海運判官遷大理評事副元  
帥郭子儀辟為從事至德初以薦被召見肅宗悅之  
拜諫議大夫累轉吏部侍郎廣德二年冬為左散騎  
常侍河中尹兼御史大夫永泰元年復為左常侍集  
賢院待制遷戶部尚書卒贈太子太師

麻察河東人由明經第五遷殿中侍御史魏元忠下獄  
子昇妻父鄭遠遣人絕婚嫁其女察劾遠敗風教請  
錮終身當時謂察為公後遷大理丞坐事為興州別  
駕齊澣往餞道密諫任王毛仲語察遽言狀澣坐貶  
察亦再貶皇化尉

薛愿河東汾陰人父緇禮部郎中兄崇一尚惠宣女宜  
君縣主女弟為廢東宮瑛妃南陽節度使魯炆奏為  
潁川太守本郡防禦使時陳留滎陽汝南等郡陷賊



方圍南陽潁川當往來道愿與防禦副使龐堅同力  
固守城中儲蓄無素兵力單寡自至德元年正月至  
十一月賊晝夜攻之不息距城百里廬舍林墓伐毀  
殆盡而外救不至賊將阿史那承慶悉以銳卒併攻  
為木驢木鷲雲梯衝棚四面雲合鼓譟如雷矢石如  
雨力攻十餘日守備皆竭賊夜半乘梯入愿與堅俱  
被執送東都將支解之或說祿山二人義士屠之不  
祥乃繫洛水濱屬苦寒一夕凍死

封常清蒲州猗氏人多所該究年過三十未有名夫蒙  
靈譽節度四鎮以高仙芝為都知兵馬使奏僉從三  
十餘人常清慨然投牒而素瘠又跛仙芝陋其貌  
不納明日復至仙芝謝去之常清怒曰我慕公義願  
事鞭勒故無媒自前公何見拒深乎以貌取士恐失  
之子羽因日候門下仙芝不得已竄名僉中會達奚  
諸部自黑山西趣碎葉靈譽使仙芝以二千騎追躡  
擒馘略盡常清於幕下潛作捷布具記井泉次舍克

賊形勢謀略條最明審仙芝取讀之皆意所欲出乃大駭即用之軍還靈嘗迎勞判官劉眺獨孤峻爭問向捷布誰作者公幕下安得此人答曰吾儻封常清也眺等驚進揖常清坐與語異之遂知名以功授疊州戍主仍為判官從戰小勃律有勞擢慶王府錄事叅軍事為節度判官仙芝征討常清從務才而果胸無疑事郎將鄭德詮仙芝乳母子也威動軍中常清嘗自外還諸將前謁德詮走馬突常清騶士去常清

命左右引德詮至廷中門輒閉因離席曰吾起細微中丞公過聽以主留事郎將安得無禮因叱曰須暫假郎將死以肅吾軍因杖死仙芝妻及乳母哭門外救請不得仙芝驚憚其公不敢讓常清亦不謝會大將有罪又殺二人軍中莫不股慄仙芝節度河西復請為判官久之擢安西副大都護安西四鎮節度副大使知節度事尋改北庭都護持節伊西節度使常清性勤儉耐勞苦出軍乘騾私廩裁二馬賞罰分明

天寶末入朝上問何策以討祿山常清見上憂大言  
曰天下太平久人不知戰然事有逆順勢有奇變臣  
請馳至東京悉府庫募驍勇挑馬箠度河計日取賊  
首以獻上壯之明日以為范陽節度副大使乘驛赴  
東京常清募兵得六萬人然皆市井庸保乃部分旗  
幟斷河陽橋以守作書遺平原太守顏真卿勸堅守  
且傳購祿山檄數十函與之真卿得以分曉諸郡祿  
山度河常清不能禦伐大木塞道以殿至穀水西奔

陝語高仙芝曰不如急守潼關仙芝從之詔削官白衣隸仙芝軍仙芝使衣黑衣監左右部監軍邊令誠構常清以賊搖衆遂詔斬於軍中常清曰吾所以不死者恐汗國家節度戮賊手今死乃甘心始常清敗徑入關欲面陳討賊事詔赴潼關因為表以謝且言自東京陷三遣使表論成敗不得對又言臣死後望陛下無輕此賊至是臨刑以表授令誠而死人多哀之唐書贊常清驅市人數萬以嬰賊鋒一戰不勝即

奪爵土欲入關見上論成敗事使者三輩上書皆不  
報回斬於軍卒使叛將得藉口執哥舒翰以降賊焉  
張介然猗氏人本名六郎性慎愿長計畫始為河隴支  
郡太守王忠嗣皇甫惟明哥舒翰領節度並署營田  
支度等使入奏稱旨賜列戟故里本鄉得列戟自介  
然始翰薦為少府監歷衛尉卿授河南節度採訪使  
守陳留不三日祿山衆度河車騎蹂騰烟塵漫數十  
里日為奪邑士聞鉦鼓聲皆褫氣不能授甲凡旬六

日城陷殺陳留降者萬人窖介然於軍門

裴冕字章甫河中河東人以蔭再調渭南尉京畿採訪使王鉷表署判官歷殿中侍御史冕明銳果於事衆號稱職鉷雅任之及鉷得罪抗言其誣鉷死獨為斂葬由是寢知名河西節度使哥舒翰辟行軍司馬玄宗入蜀拜御史中丞兼左庶子為皇太子副冕方召還而道遇太子平涼遂從至靈武與杜鴻漸崔漪同辭進曰今南狩蜀宗社神器要須有歸宜正位號如



逡巡失億兆人則大事去矣太子辭對曰曩養德承  
華二十年今多難啓聖以安社稷而所從將士皆關  
輔人日夜思歸大衆一騷不可復集不如因而撫之  
以就大功太子固讓凡五請卒見聽進冕中書侍郎  
同中書門下平章事肅宗至鳳翔罷政事拜尚書右  
僕射封冀國公實封五百戶出為劔南西川節度使  
復為右僕射待制集賢院俄充山陵使表劉烜為判  
官烜抵法坐降施州刺史徙澧州大厯中郭子儀言

於代宗曰冤馳驅靈武有社稷勲程元振忌其賢遂加誣構海內冤之宜還冤於朝復俾輔相必能致治成化元載亦嘗德之遂拜左僕射同中書門下平章事俄兼河南江淮副元帥東都留守不踰月卒贈太尉冤以忠勤自將然不知宰相大體卒後二十餘年蘇正元奏肅宗為元帥時師纔一旅冤於草創中甄大義以勸進收募驍勇幾十餘萬既逾月房琯來又一年而苗晉卿至今晉卿從祀冤乃不與詔冤配享

肅宗廟

呂諲河中河東人少力於學志行整飭孤貧不自業里人程氏以女妻諲厚分貲贍濟故稱譽日廣開元末第進士調寧陵尉採訪使韋陟署支使哥舒翰節度河西表度支判官歷太子通事舍人秉性靜慎勤總吏職諸僚或出游諲獨頽然據案鉤視簿最翰益親之累兼殿中侍御史西趨靈武拜御史中丞陳事無不順納遷武部侍郎與李峴同領三司使諲援律傳

經過峴當時憚其持法乾元二年擢同中書門下平章事知門下省會喪解三月復召知門下省事兼判度支還執政累封須昌縣伯遷黃門侍郎上元初加同中書門下三品罷為太子賓客數月拜荊州長史澧朗峽忠等五州節度使請荊州置南都詔可於是更號江陵府以譔為尹置永平軍萬人遏吳蜀之衝以湖南之岳潭郴道邵連黔中之涪凡七州隸其道初衡州蠻陳希昂為長史張惟一司馬督家兵千人

脇殺親將牟遂金後過江陵入謁諲伏甲擊殺之誅  
黨偶數十人積尸府門內外震服妖人申泰芝事李  
輔國擢諫議大夫總邵道二州軍事潭州刺史龐承  
鼎劾賊鉅萬詔諲按罪諲使判官嚴郢具獄暴泰芝  
之惡承鼎竟死郢流後泰芝終以賊徙死諲為治  
不急細務決大事剛果不撓始在河西悉知諸將能  
否及為尹秦取材者數十人總牙兵故威惠兩行李  
揆妄奏置軍湖南非便又陰遣人刺過失諲訟其事

上遂揆出之諲羸疾卒年五十一贈吏部尚書諲在  
朝不稱任職相及為荊州號令嚴明賦斂均一治尚  
威信軍士用命闔境無盜賊民歌詠之自至德以來  
處方面數十人諲最有名荆人生構祠及歿吏裒錢  
十萬徙祠府西始薦杜鴻漸元載才後皆為宰相永  
泰中嚴郢以故吏請諡博士獨孤及諡曰肅郢請益  
曰忠肅及執奏諡遂不改

薛播河中寶鼎人曾祖文思中書舍人播兄弟七人皆

擢進士第累授殿中侍御史遷武功萬年令溫敏而  
裕與人交有常李栖筠常袞崔祐甫竝器之祐甫輔  
政拜中書舍人出為汝州刺史坐小累貶泉州再遷  
河南尹以禮部侍郎卒贈尚書子公達擢進士第佐  
鳳翔軍帥嘗集射設的高數十尺令曰中者酬錦與  
金一軍莫能中公達執弓矢揖曰請為公歡射三發  
連中衆大呼笑帥不喜自免去復佐河陽軍以國子  
助教卒

薛革河中寶鼎人七世祖道實隋禮部尚書父順奉天尉楊國忠將引之輒謝絕革以吏最拜長安令歷虢州刺史憲宗時奏最擢湖南觀察使徙浙東以治行遷浙西加御史大夫累封河東郡公所居守法度務在安人治身儉薄衣綠袍更十年至緋衣乃易居三鎮不聽聲樂所得祿即分散親屬故人而無餘藏除左散騎常侍年七十致仕居四年卒贈工部尚書諡曰宣革長於詩兄芳有器幹萊與革其母代宗從母



也以外戚奉朝請皆贊善大夫革子膺太和初右補  
闕內供奉弟齊佐興元李絳幕府絳遇害齊死於難  
聞不及請馳赴之哀甚聞者垂泣後歷工部員外郎  
敬括字叔弓河中河東人進士及第遷殿中侍御史楊  
國忠惡之外除果州刺史累進兵部侍郎性深厚志  
尚簡淡在職不求名周智光誅議者健括才選為同  
州刺史拜御史大夫隱默持重弗以私害公大厯中  
卒

董晉字混成河中虞鄉人擢明經肅宗幸彭原上書行  
在拜秘書省校書郎待制翰林出為淮南崔圓府判  
官累遷祠部郎中大歷中李涵送崇徽公主於回紇  
署晉判官回紇見使者倨因問歲市馬而唐歸我賄  
不足何也涵數目晉晉曰我非無馬而與爾為市為  
爾賜者不已多乎爾之馬歲五至而邊有司數疲償  
貲天子不忘爾勞勅吏無得問爾反用是望我邪諸  
戎以我之爾與也莫敢確爾父子寧畜馬蕃非我則

誰使衆皆南面拜還遷秘書少監德宗立授太府卿  
不旬日為左散騎常侍兼御史中丞知臺事出為華  
州刺史朱泚遣兵攻之晉走行在改國子祭酒宣慰  
恒州還至河中說李懷光曰朱泚苟得志於公何有  
且公位太尉泚雖寵公亦無以加彼不能事君能以  
臣事公平公能事彼而有不能事君乎公若襲取賊  
清宮以迎天子雖有大惡猶將掩焉如公則誰敢議  
懷光喜且泣晉亦泣又語其將卒皆拜故懷光雖偃

蹇亦不助泚遷左金吾衛大將軍改尚書左丞右丞  
元琇為韓滉排窄得罪晉見宰相誦琇非罪士大夫  
壯其節貞元五年以門下侍郎同中書門下平章事  
實參裁可大事晉無所駁異九年罷為禮部尚書以  
兵部尚書為東都留守復詔檢校尚書左僕射同中  
書門下平章事為宣武節度副大使知節度事李萬  
榮死鄧惟恭總其軍晉受命不召兵惟幕府騶僕從  
之即日上道至鄭逆者不至人勸止晉不聽直造汴

及郊惟恭始出迎謁既入即委以軍政無所改更盡  
罷幕下勇士衆服晉有體惟恭潛謀晉覺之殺其黨  
械惟恭送京師詔拜汝州刺史長源為司馬以佐晉  
晉廉愿儉簡事多循仍故軍粗安長源數欲變更諸  
事晉初許之已而悉罷不用以財賦委孟叔度晉在  
軍五年卒年七十六贈太傅諡曰恭惠晉為相時五  
月朔會朝竇參攝中書令當傳詔疾作晉從容進曰  
攝中書令臣參病不能事臣請代參事南面宣致詔

詞進退甚詳金吾將軍沈房期喪常服入閣上問晉  
對曰故事朝官期以下喪服絕縵不復衣淺色南班  
亦如之又問晉冠冕之制對曰古者服冠冕以佩玉  
節堂上接武堂下布武君前趨進而已今或奔走以  
致顛仆在武朝臣皆綾袍五品而上金玉帶所以盡  
飭以奉上故漢尚書郎含香老萊采服君父一也若  
然服絕縵亦非禮也上然其言子溪字惟深亦擢明  
經三遷萬年令擢度支郎中為東道行營糧料使流

封州辟於長沙子居中善詩張籍稱之

張延賞嘉貞子雖蚤孤而博涉經史通吏治苗晉卿尤  
器許以女妻之擢監察御史辟署關內節度使王思  
禮府思禮守北都表為副入遷刑部郎中元載薦為  
給事中御史中丞大厯初除河南尹諸道營田副使  
政簡約輕徭賦疏河渠築宮廟數年流庸歸附都闕  
完雄有詔褒美時罷河南山南等副元帥兵屯東都  
詔延賞知留守以兵屬居五年治行第一召還拜御

史大夫出為淮南節度使歲旱民它遷吏禁之延賞  
曰苟存吾人何限為乃具舟遣之勅吏為修室廬已  
逋債而歸者更增於舊爪步舟艫津湊而遙繫江南  
請度屬揚州自是行無稽壅母服除累拜荆南劔南  
西川節度使建中中西山兵馬使張朮襲成都賞奔  
鹿頭戍謀知朮不設備遣將捕斬朮復成都時公私  
蕭然延賞事為之制薄入謹出府庫遂實德宗在奉  
天貢獻踵道及次梁倚劒蜀為根本即拜中書侍郎



同中書門下平章事上還詔入秉政李晟表陳宿憾  
罷為尚書左僕射上命韓滉移書道意滉從容邀晟  
平憾且使薦延賞於帝復拜平章事既而宴禁中上  
出瑞錦一端分繫之晟因為子婚延賞不許晟曰我  
武夫雖有舊惡盃酒間可解儒者難犯外睦而內含  
怒今不許婚釁未忘也卒罷晟兵建言宜併省州縣  
員悉收廩科糧課輸京師賞戰士許之是年除吏千  
五百員當省者千餘卒年六十一贈太保諡曰成肅

延賞更四鎮所至民頌其愛上稱其奏議有宰相體  
專屬以吏事而以軍食委李泌刑法委柳渾時以為  
任職

張弘靖字元理延賞子雅厚信直以蔭為河南參軍杜  
亞辟佐其府亞疑牙將令孤運劫餉絹弘靖直其枉  
亞斥出府裴延齡為德陽公主治第欲徙弘靖先廟  
上疏自言德宗異之擢監察御史累遷戶部侍郎陝  
州觀察使徙河中節度使元和中拜刑部尚書同中

書門下平章事吳元濟擅總留務請先遣使者弔贈  
待不恭乃加兵詔可進中書侍郎封高平縣侯武元  
衡遇害御史臺劾王承宗邸卒張晏弘靖疑傳致上  
竟誅晏并討承宗弘靖曰戎事竝興鮮有濟不如悉  
力淮西已平乃治河朔議再迁乃歸政以檢校吏部  
尚書同平章事為河東節度使大閱兵請身討賊既  
王師無功上憶曩言下詔褒美弘靖亦遣使問道喻  
承宗承宗款附召拜吏部尚書徙節宣武承韓弘後

代以寬簡民便安之長慶初劉總內屬請弘靖為代  
進檢校司空仍同中書門下平章事充盧龍節度使  
肩輿而行人駭異旬一決事委成於參佐韋雍張宗  
厚嘗詬士曰天下無事爾輩挽兩石弓不如識一丁  
字軍遂亂囚弘靖薊門館掠其家貲婢妾執雍等殺  
之詔貶太子賓客分司東都再貶吉州刺史明年出  
幽州改撫州刺史稍遷太子少師卒年六十五贈太  
子太保弘靖少有令聞杜鴻漸杜佑皆器許歷臺閣

顯級人以為有輔相才及居位簡默自處幽薊初效  
順不能因俗制變故復失范陽焉予文規次宗裴度  
秉政引文規為右補闕後貶溫令度奏置襄陽幕府  
累轉吏部員外郎出為安州刺史終桂管觀察使子  
彥遠博學有文辭乾符中至大理卿次宗開成初為  
起居舍人記開成時事最詳以稱職兼集賢院直學  
士改國子博士史館修撰李德裕引為考工員外郎  
知制誥出澧明二州刺史卒孫茂樞字休府及進士

第天祐中累遷祠部郎中知制誥坐柳璨貶博昌尉  
樊澤字安時河中人少客河朔相衛節度使薛嵩表堯  
山令舉賢良方正上第楊炎善之擢左補闕澤有武  
力喜兵法議者謂有將帥器召對延英德宗嘆其論  
兵與我意合累遷山南東道司馬就拜節度使每獵  
諸將憚其才武擒李希烈驍將張嘉瑜杜文朝梁悅  
之等取唐隋二州貞元三年為荆南節度使會山南  
東道嗣曹王臯卒軍剽居人以澤威惠著襄漢徙山

南東道加檢校尚書右僕射十四年卒年五十七贈  
司空諡曰成撤宴廢朝

薛珏字溫如河中寶鼎人以蔭為懿德太子廟令累遷  
乾陵臺令以清白聞課第一改昭應令人請立石紀  
德珏固讓遷楚州刺史州有營田宰相遙領使而刺  
史得專達俸及它給百餘萬田官數百歲遷別戶三  
千備刺史廨役珏悉條去之租入贏異時觀察使誣  
以罪左授峽州刺史建中初升黜使李承狀珏之簡

趙贊言其廉盧翰稱其肅書參聞拜中散大夫賜金  
紫劉玄佐表兼汴宋行軍司馬李希烈棄汴州即拜  
刺史遷河南尹入為司農卿詔備刺史縣令選宰相  
欲校以文詞珏曰求良吏宜以上愛人之本為心也  
宰相多其計所用皆稱職為京兆尹司農供三宮畜  
茹三十車不足請市京兆珏使萬年令韋彤禁鬻賣  
坐奪俸珏剛嚴曉法治勤身以勸下坐善實叅改太  
子賓客出為嶺南觀察使卒年七十四贈工部尚書



子存慶字嗣德貌偉岸及進士第歷御史尚書郎五遷給事中封駁詔書時稱其直劉總以幽州歸穆宗謂宰相曰必用薛存慶可以宣朕意對延英一刻遣之至鎮州卒贈吏部侍郎

衛次公字從周河中河東人舉進士高第調渭南尉嚴震辟佐興元府累遷殿中侍御史貞元中擢左補闕翰林學士貞元末召至金鑾殿議所立次公曰冢嫡內外係心必不得已宜立廣陵王議乃定王叔文等

用事多所持正知禮部貢舉片華取實不為權力侵撓由中書舍人充史館修撰改兵部侍郎坐鄭綱罷下除太子賓客久乃為陝虢州觀察使蠲橫租錢歲三百萬復入為兵部侍郎李勣徐有功孫皆以負不得調召見曰子之祖勳在王府寧限常格乎即優補而遣進尚書左丞時討蔡數建請罷兵上將相之制藁具而蔡捷書至乃以檢校工部尚書為淮南節度使久之召還卒年六十六贈太子少傅諡曰敬次公

本善琴京兆尹李齊運嘗使子請受琴法次公拒絕  
因終身不復鼓其節尚終始完潔子洙舉進士尚臨  
真公主檢校秘書少監駙馬都尉文宗曰洙起名家  
以文進宜諫官寵之乃為左拾遺義成節度使咸  
通中卒

范希朝字致君河中虞鄉人初為邠寧軍別將以奉天  
戰守功累兼御史中丞治軍整毅節度使韓游瓌畏  
其才希朝奔鳳翔上召寘左神策軍貞元四年使代

游瓌希朝曰始偏而來終代其任非所以防覲覲安  
反側也固讓左金吾衛將軍張獻甫軍中必得希朝  
乃止詔拜寧州刺史邠寧節度副使俾佐獻甫俄遷  
振武節度使部有党項室韋日入慝作謂之刮城門  
希朝度要害置屯堡斥邏嚴密鄙民以安至竊賊亦  
殺無赦虜人憚伏邊州長帥至必效索駝駿馬希朝  
一不納積十四年虜保塞不敢橫初單于府地不樹  
希朝命蒔柳數歲成林貞元末請朝時諸鎮不以事

自述職者希朝而已上悅拜右金吾衛大將軍王叔  
文用為右神策統軍充左右神策京西諸城鎮行營  
節度使屯奉天憲宗立檢校尚書左僕射復為右金  
吾衛大將軍俄檢校司空出為朔方靈鹽節度使遷  
河東討王承宗敗之木刀溝還朝改左龍武統軍以  
太子太保致仕卒贈太子太師諡曰忠武改宣武希  
朝號當世善將武比之趙充國在朔方招沙陀千落  
衆萬餘其後用沙陀戰者所至有功

薛存誠字資明河中寶鼎人中進士第累擢監察御史  
元和初中人為館驛使存誠以為害體甚奏罷之轉  
殿中侍御史累遷給事中瓊林庫廣籍工徒存誠曰  
此姦人羣名以避征役不可許神策軍誣奏咸陽尉  
袁儋儋被罰二勅皆執不下上悅遣使勞之拜御史  
中丞浮屠鑒虛自貞元中關通賂遺倚宦豎為奸會  
坐事捕下獄存誠窮劾之得贓數十萬當以大辟詔  
釋之存誠不聽明日詔使詣臺諭曰朕須此囚面詰

非赦也存誠奏曰獄已具必欲詔赦之請先殺臣乃可不然臣不敢奉詔鑒虛卒抵死江西監軍高重昌妄劾信州刺史李位不軌追付仗内存誠一日三表請付御史臺及按果無實尋復為給事中御史中丞闕上謂宰相曰持憲無易存誠復命之會卒上悼惜贈刑部侍郎存誠性和易於人無所不容及當官毅然不可奪

薛戎字元夫河中寶鼎人客毗陵陽羨山年四十餘不

仕江西觀察使李衡辟幕府三返乃肯應故宰相齊映代衡奏留之府罷復歸陽羨福建觀察使柳寬辟佐其府寬欲除泉州別駕馬總以附宦倖使戎攝刺史按置其梟戎曰以是待我耶我始不願仕正謂此爾不肯從還白其狀寬怒據案引戎入戎終不為屈遂自放江湖間藩府交奏稍遷河南令吐突承璀討鎮州惟戎境內不治道不迂留府卒犯令者縛置獄留守遣將略出之不與累遷浙東觀察使弛酒橘禁



卒官年七十五贈左散騎常侍戎為吏不尚約束絕名譽其有善歸之所部故居官時無灼灼可驚者已罷則懷之悉奉廩調濟內外親既病以所有分遺之衆皆哭而去

胡証字啓中河中河東人舉進士第渾瑊美其才奏寘幕下由殿中侍御史為韶州刺史以母老辭為太子舍人更為襄陽千頃掌書記入為戶部郎中詔兼御史中丞為魏博田弘正副使入遷諫議大夫元和九

年以儒而勇選拜振武軍節度使道河中時趙宗儒  
為帥以州民入謁里人榮之居四年召任金吾大將  
軍又充京西京北巡邊使太和公主降回鶻以檢校  
工部尚書為和親使請儉受省費以絕私覲禮鬻官  
之濫次漠南回鶻欲屈脇之且言使者必易服又欲  
主便道疾驅証固不從以唐官儀自將訖不辱命還  
拜工部侍郎改京兆尹左散騎常侍寶厯初以戶部  
尚書判度支固辭拜嶺南節度使卒年七十一贈尚

書右僕射証膂力絕人晉公裴度未顯時羸服私飲  
為武士所窘証聞突入坐客上引觥三醕取鐵燈檠  
摘枝葉櫟合其跗橫膝上曰我欲為酒令飲不醕者  
以此擊之衆唯唯証一飲輒數升次授客客不能盡  
証欲擊之諸惡少叩頭請去証悉驅出故時人稱其  
俠

馬存亮字季明河中人元和時累擢左神策軍副使左  
監門衛將軍知內侍省事進左神策中尉軍所籍凡

十餘萬存亮料東无精伍無罷士部無冗員敬宗初  
張韶蘇元明之變將幸右神策或曰不如入左軍近  
且速從之初右軍中尉梁守謙有寵至是存亮出迎  
捧足負而入以五百騎往迎二太后遣左神策大將  
軍康藝全等率騎兵討賊日暮射韶及元明皆死賜  
實封戶二百時存亮功最高乃推委權勢求監淮南  
軍代還為內飛龍使太和中以右領軍衛上將軍致  
仕封岐國公卒贈揚州大都督存亮逮事德宗更六

朝資端畏善訓士始去禁衛衆皆泣唐世中人以忠謹稱者唯存亮西門季元嚴遵美三人而已

薛廷老字商叟存誠子及進士第讜正有父風寶厯中為右拾遺嘗與舒元褒李漢入閣論奏曰此除拜不由宰司擬進恐綱紀寢壞奸邪放肆上厲語曰更論何事元褒曰宮中興作太甚上變色曰興作何所元褒不能對廷老曰臣等以諫為職有聞即應論奏然見外輦材瓦絕多知有所營上曰已諭時造清思院

殿中用銅鑑三千薄金十萬餅故怨言之尋加史館  
修撰嶺南節度使鄭權以公庫寶貨輸鄭注家廷老  
表按權罪中人切齒又論李逢吉黨張權輿程昔範  
不宜居諫爭官逢吉怒會告滿百日出為臨晉令文  
宗立召為殿中侍御史李讓夷數薦之拜翰林學士  
以疎放罷開成三年遷給事中侶侶不干虛譽推為  
正人卒贈刑部侍郎子保遜第進士累擢給事中保  
遜子昭緯乾寧中禮部侍郎貶磧州刺史

盧簡能綸子第進士性長厚歷駕部員外郎太和九年  
鄭注拜鳳翔隴右節度使請寮屬李訓舒元與慮其  
豪俊為助擇長厚士以簡能與蕭傑同為注判官注  
敗遇害人皆寬之

盧弘正字子彊綸子佐劉悟府累擢監察御史沈傳師  
表江西團練副使入拜侍御史按華州刺史宇文鼎  
戶部員外盧允中賊文宗將殺鼎弘正執據梟由允  
中鼎乃連坐不應死上釋之累遷給事中會昌中討

劉稹宰相李德裕畏魏博成德請地乃以弘正為邢  
洺磁團練觀察留後制未下稹平即詔為三州及河  
北兩鎮宣慰使還拜工部侍郎以戶部領度支使判  
官司空與檢鈎釐正課入歲倍踰年出為武寧節度  
使銀刀軍不法戮其尤無狀者終弘正治不敢譁優  
詔褒勞丐還東都不許徙宣武卒於鎮贈尚書右僕  
射子虔灌有美才終秘書監

盧簡求字子臧綸子始從江西王仲舒幕府兩為裴度



元稹辟又佐牛僧孺鎮襄陽入遷戶部員外郎會昌  
中討劉稹以忠武節度使李彥佐為招討使選簡求  
副之俾知後務歷蘇壽二州刺史大中九年黨項擾  
邊拜涇原渭武節度使徙義武鳳翔河東三鎮簡求  
為政長權變文不害居邊善綏御人皆安之太原統  
退渾契苾沙陀三部它帥或與詛盟質子弟寇掠不  
為止簡求歸所質開示至誠憚其恩信不敢亂久之  
辭疾以太子少師致仕還東都治園沼林苑卒年七

十六贈尚書左僕射子嗣業汝弼皆進士第嗣業子  
文紀

敬晦字日彰進士及第辟山南東道節度府與馬曙聯  
舍曙廷責大吏吏員兼軍職不引咎走訴諸府牙將  
十輩申吏枉晦讓諸將曰吏冒軍名公等不能詰反  
引與為伍奈何衆愧謝闔府咨美累擢諫議大夫武  
宗時趙歸真挾詐御史平吳湘獄得臯晦上疏極道  
非是不少回縱大中中歷御史中丞刑部侍郎諸道

鹽鐵轉運使浙西觀察使歲連饑處身儉勤貲力遂  
充徙究海節度使以太子賓客分司卒贈兵部尚書  
諡曰肅晦兄昕暉弟昫煦胥第進士昕為河陽節度  
使暉右散騎常侍世寵其家

司空輿河中虞鄉人有風幹當大中時盧弘正管鹽鐵  
表為安邑兩池榷鹽使先是法疏闊吏輕觸禁輿為  
立約數十條莫不以為宜以勞再遷戶部郎中

司空圖字表聖河中虞鄉人輿子咸通末擢進士禮部

侍郎王凝特所獎待凝貶商州圖感知已往從之凝起拜宣歙觀察使辟置幕府召為殿中侍御史不忍去凝府臺劾左遷光祿寺主簿分司東都盧攜嘉圖節常與遊攜還朝過陝號屬觀察使盧渥曰司空御史高士也渥即表為僚佐會攜復執政召拜禮部員外郎尋遷郎中黃巢之難將奔不得前圖弟奴段章陷賊執圖手曰我所主張將軍喜下士可往見之無虛死溝中圖不肯往遂奔咸陽間關至河中僖宗次

鳳翔拜知制誥遷中書舍人後狩寶雞不獲從又遷  
河中龍紀初復拜舊官以疾解景福中拜諫議大夫  
不赴後再以戶部侍郎召謝闕下數日即引去昭宗  
在華召拜兵部侍郎以足疾固自乞會遷洛陽詔入  
朝圖陽墮笏趣意野耄柳璨知無意於世乃聽還圖  
本居中條山王官谷有先人田遂隱不出作亭觀素  
室悉圖唐興節士文人名亭曰休休作文以見志曰  
休美也既休而美具故量才一宜休揣分二宜休耄

而賸三宜休又少也情長也率老也迂三者非濟世  
用則又宜休因自目為耐辱居士預為塚棺歲時祠  
禱圖與閭耆老相樂王重榮父子雅重之數饋遺弗  
受嘗為作碑贈絹數千圖置虞鄉市人得取之一日  
盡時寇盜所過殘暴獨不入王官谷士人依以避難  
梁初召為禮部尚書不起聞洛陽信不食卒年七十  
二圖無子以甥為嗣嘗為御史所劾昭宗不責也

薛廷珪逢子進士及第大順初以司勳員外郎知制誥

遷中書舍人從次華州引拜左散騎常侍稱疾免客  
成都光化中復為舍人累尚書左丞以官告使至汴  
客將諷其拜廷珪佯不曉曰吾何德敢受令公拜乎  
及見卒不肯加禮

楊仲昌字蔓元琰子以通經為修文生調河陽尉對策  
擢第一授蒲州法曹叅軍判入異等遷監察御史坐  
累為孝義令鸞降庭樹太守蕭忠表其政徙下邳終  
吏部郎中仲昌資長於吏常分父邑租賑宗黨御身

卷一百二十四  
以約善與人交士樂從游焉

五代

王瓚河中人重榮諸子事梁為諸衛大將軍泰寧鎮國  
軍節度使末帝時為開封尹貞明五年代賀瓌為北  
面行營招討使自黎陽渡河攻澶州不克退屯楊村  
扼河上流與晉人相持經年大小百餘戰卒無功代  
還復開封尹唐兵過宛胸瓚驅率市人登城拒守及  
攻封丘門瓚開門迎降莊宗勞而起之曰朕與卿家



世婚姻然人臣各為其主耳復何罪因為開封尹  
遷宣武軍節度使已而以憂卒贈太子太師

盧文紀字子持祖簡求唐太原節度使父嗣業右補闕  
文紀舉進士事梁為刑部侍郎集賢殿學士唐明宗  
時為御史中丞初上事諸道進奏官賀文紀據牀端  
笏臺吏通名贊拜請悉復中外官校考法將相天子  
自書之詔雖施行而官卒不考遷工部尚書貶石州  
司馬久之為祕書監太常卿奉使於蜀過鳳翔時廢

帝為鳳翔節度使文紀為人形貌魁偉語音琅然廢  
帝竒之後入立欲擇宰相左右皆言文紀及姚顗有  
人望廢帝因悉書清望官姓名內琉璃瓶中夜焚香  
祝天以筮挾之首得文紀欣然相之拜中書侍郎同  
中書門下平章請罷五日起居復唐故事開延英冀  
得從容奏議天下事因詔宰相有事不以時詣閣門  
請對及北征至河陽勸帝扼橋自守不聽晉初罷為  
吏部尚書累遷太子太保致仕周初拜司空於家卒

年七十六贈司徒

楊彥詢字成章河中寶鼎人少事青州王師範師範聚書萬卷使彥詢掌之以聰悟見親信師範降梁乃之魏事楊師厚為客將魏博入晉因留事晉為引進副使奉使吳蜀常稱旨歷德州刺史羽林將軍晉高祖鎮太原以彥詢為太原節度副使後欲拒命彥詢不敢正言因曰太原之力能與唐敵否公其審計之高祖左右以彥詢異議欲殺之高祖遽止之曰惟副使

一人我自保之乃免為宣徽使數往來遼帳中遼太宗愛其為人明年拜感德軍節度使復入為宣徽使又拜安國軍節度使天福七年徙鎮鎮國遭歲大饑為政有惠愛罷為右金吾衛上將軍卒年七十四贈太子太師

張藏英猗氏人唐相嘉貞後僑范陽後唐末舉族為賊孫居道所害藏英年十七僅免後逢居道於幽州市引佩刀刺之不死為吏所執節帥趙德鈞壯之釋不

問以補牙職後因居道避地關南求為關南都巡檢  
使至則微服攜鐵撾匿居道舍側伺其出擊之仆於  
地齧其耳噉之遂擒歸設父母位陳酒餼縛居道於  
前號泣鞭之齧其肉經三日剗其心以祭即詣官首  
服官為上請而釋之燕薊間稱報讎張孝子遼用為  
盧臺軍使兼權鹽制置使領坊州刺史周廣順三年  
率內外親屬并部兵千餘人及煮鹽戶長幼七千餘  
口牛馬萬計舟數百艘航海歸周至滄州刺史李暉

以聞令館於封禪寺俄賜襲衣銀帶錢千萬絹百匹  
銀器鞍勒馬世宗授德州刺史召歸詢備邊策藏英  
請以深州李晏口置砦及誘境上亡命隸軍悉從之  
以為緣邊招收都指揮使賜名馬金帶藏英遂築城  
李晏口累月募勁兵數千人王彥超巡邊為遼所圍  
藏英率新募兵馳往擊之轉戰十餘里遼人解去改  
濮州刺史仍領邊任遼將高牟翰擾邊藏英追擊於  
胡盧河北自旦至晡殺傷甚衆牟翰遁後領兵巡樂

壽遼驍將姚內斌偵知藏英兵少以精騎二千陣縣北藏英率麾下擊之自辰及申士皆殊死戰內斌遂解去降璽書褒美征瓦橋關為先鋒都指揮使敗遼騎數百於關北下固安縣又改關南排陣使宋初遷瀛州團練使并護關南軍建隆三年卒年六十九

宋

袁彥河中河東人少以趨勇隸奉國營漢乾祐中周祖討李守貞置麾下及鎮鄴為部直小將周廣順中世

宗在澶淵遷親事都校改開封府步直指揮使顯德  
初授內外步軍都軍頭泉州刺史尋改岳州防禦使  
從征壽州為城北造竹龍都部署載甲士數百攻其  
城又修渦口橋成世宗幸焉因立鎮淮軍命彥為武  
信軍節度權侍衛步軍都指揮使又為淮南道行軍  
馬步軍副都指揮使賜衣服金帶鞍勒馬鎧甲器仗  
太祖下滁陽擒皇甫暉姚鳳彥皆有勞詔褒之又令  
屯下蔡以逼壽春從攻濠泗擒南唐將許文績邊鎬



等師還授步軍都指揮使領彰信軍節度六年春命發近畿丁壯浚五大河恭帝時命移保義軍宋初加檢校太尉來朝改鎮曹州乾德六年移靜難軍開保二年移鄆州五年罷鎮歸卒年六十六景德四年特錄其孫昭慶為借職大中祥符八年特遷殿直

高寃字子莊河中虞鄉人錫兄子周顯德中詣闕上書稱旨擢諫議大夫宰相范質以為超擢太過特授將仕郎守右補闕賜賚加等宋初由膳部都官員外郎

累至膳部郎中出知益州雍熙二年卒年五十贈右  
諫議大夫錄其子垂休

裴瑾萬泉人仕至永清軍節度掌書記乾德初轉右補  
闕隸職如故開寶初加上柱國

裴濟字仲溥絳州聞喜人唐相耀卿八世孫徙河中少  
事晉邸糾同輩過失被譖出補太康鎮將譖者尋坐  
法太宗知濟可任補殿直為天威軍兵馬監押又令  
監軍易州遼攻城不能下遷西頭供奉官太平興國

末江表盜起命為巡檢遷崇儀副使召還遷使監戍  
兵於威虜軍次鎮州賊騎夜扣城門大呼曰官軍至  
矣州將促開關濟遽止之曰此必妄也及旦果有敵  
兵遯去上嘉之遷西上閤門使定州都監就加行營  
鈐轄尋知定州契丹三萬騎來攻逆擊於徐河斬數  
千級獲牛馬鎧仗甚衆淳化初判四方館尋為鎮州  
行營鈐轄又與李繼隆擊賊於唐河濟短兵陷陣賊  
大敗走優詔褒美初繼隆以濟性剛不悅之及是恨

相知之晚改四方館使知定州徙天雄軍鈐轄遷客  
省使復知定州至道二年改內客省使知鎮州立春  
出土牛卒挾牛去濟亟命擒之果有竊發者數十人  
已刼鄜間矣悉蒐捕腰斬之軍民肅然濟在鎮定十  
五年威績甚著召還知天雄軍咸平初領順州團練  
使知靈州兼都部署謀緝八鎮興屯田民甚賴之三  
年清遠軍陷夏人斷饗道絕援軍濟刺指血染奏求  
救甚急兵不至城陷死之特贈鎮江軍節度三子竝

優進秩濟有聲望及沒夏人皆惜景德中濟妻永泰  
郡君景氏卒特詔追封平陽郡夫人諸子給奉終喪  
子德裕虞部郎中德基如京使德豐殿中丞濟兄麗  
澤弟麗正竝進士及第麗澤右補闕麗正金部員外  
郎麗正子德興殿中丞

裴德裕濟子以錄蔭自四門助教拜太子右贊善大夫  
累官少府監勲上柱國爵開國侯以老分司西京為  
吏廉清不擾始知蓬絳解號澤沂六州皆有能政

劉綜字居正河中虞鄉人少依外兄通遠軍使董遵誨遵誨嘗遣貢馬太祖嘉其敏辨將授三班綜自陳素習詞業願應科舉及還上解真珠盤龍衣令賜遵誨綜辭曰遵誨人臣安敢當此上曰吾委遵誨方面不以此為疑也雍熙二年第進士為邛州軍事推官就改永康軍判官遷大理評事判眉州轉太僕寺丞代還對便殿言益州長吏望慎擇其人上嘉之改太子中允未幾果有李順之擾復召見面賜緋魚尋為三

門發運司水陸轉運使通判大名府服闋知建安軍  
請降天長軍為縣隸揚州以六合縣隸建安軍自是  
民力均濟時淮南轉運使王嗣宗兼發運使請復置  
都大發運司專幹其職至道二年遷太常丞職事修  
舉多稱薦之咸平初判三司都理文憑由司出為河  
北轉運副使嘗言州縣幕職官以昏耄放罷者其間  
實有廉謹之士全藉祿廩以濟朝夕望自今竝除致  
仕官又言法官斷獄皆引律令及其奏御復云慮未

得中別取進止殊非一成不變之道望降旨約束時  
河北幕職州縣官多不習風俗請竝以河朔人充之  
徙陝西轉運副使轉太常博士梁鼎議禁解鹽官自  
貨鬻命綜與杜承睿制置青白鹽事綜條上利害力  
言非便卒罷其事時獻言者多請棄靈州綜上言曰  
國家財力雄富士卒精銳而未能剪除凶孽者誠以  
賞罰未行而所任非其材故也今或輕從羣議欲棄  
靈州是中賊之奸計矣且靈州民淳土沃為西陲巨



屏所宜固守以為扞蔽然後於浦洛河建軍城屯兵積糧為之應援此暫勞永佚之勢也況鎮戎軍與靈州相接今若棄之則原渭等州益須設備較其勞費十倍而多則利害之理昭然可驗矣俄克轉運使四年議於鎮戎軍置屯田務錄唐安國鎮制置城壕鎮戎古記石本以進詔從其請俄詣闕奏事稱旨賜金紫緡錢五十萬復遣涖職又嘗言西川荆湖江浙福建廣南知州或地居津要或戶口繁庶望親加選任

其執政舊臣及給舍以上知州處亦宜擇通判又京  
朝官當任遠官者率以父母未葬為辭宜禁從之五  
年拜工部員外郎兼侍御史知雜事六年遷起居舍  
人再為河北轉運使繼領漕任號為詳練上眷矚甚  
厚盛言急輒資其奏處遼請和乃遣近臣諭以擢用意  
景德三年召拜戶部員外郎樞密直學士勾當三班  
院言御史員數至少望詔兩制以上各舉才堪御史  
者充三院共署十員若出使按獄官吏能否生民利

病刑獄枉濫悉得察舉四年西幸道出河陽權知孟  
州事復知并州以政績聞州民乞留優詔嘉獎歸朝  
知審官院改吏禮二部郎中充職兼知通進銀臺封  
駁司大中祥符四年館伴契丹使因作大雪歌以獻  
即命同知貢舉俄權知開封府以貴要交結富民奏  
授試秩頗紊公政請加抑止從之七年求典河中上  
以大寧宮廟長吏奉祠而綜艱於拜起命知廬州明  
年授右諫議大夫八年卒年六十一綜強敏有吏材

所至抑挫豪右振舉文法時稱幹治子建中正中竝  
贊善大夫弟綽淳化三年進士官刑部郎中

薛顏字彥回河中萬泉人舉三禮中第為嘉州司戶叅  
軍代還對稱旨改將作監丞監華州酒稅以秘書省  
著作佐郎使夔峽疏決刑獄還改太子左贊善大夫  
知雲安軍徙渝閬二州擢三司鹽鐵判官河北計置  
糧草初丁謂招撫溪蠻有威惠詔謂自舉代謂薦顏  
為峽路轉運使累遷尚書虞部員外郎始孟氏據蜀

徙夔州於東山據峽以拒師而民居不便也顏為復其故城命勾當廣南東西路轉運司事平宜州賊陳進遷金部員外郎改河東轉運使祀汾陰徙陝西河中浮橋歲敗顏即北岸醴上流為支渠以殺水怒因取渠水溉其旁田民利之奏請罷坊鑿則晉鑿當大售後如其策徙河北歷知河陽杭徐州累遷光祿少卿以少府監知江寧府邏者晝劫人執平人以告顏視其色動曰若真盜也械之果引伏轉右諫議大夫

知河南府仁宗初遷給事中徙知應天又徙耀州豪  
姓李甲結客數十人號沒命社顏索其黨會赦特杖  
甲流海上餘悉籍於軍以光祿卿分司西京卒

張鑑字德明猗氏人藏英孫也父裔蔭補供奉官鑑本  
將家幼能嗜學入衛州霖落山肄業凡十餘年太平  
興國三年第進士為大理評事監泰州柴墟權務升  
右贊善大夫知婺州就遷著作郎還拜監察御史決  
獄江左多雪冤滯歷殿中侍御史曹彬等北代鑑上

疏極言不可與趙延進同掌左藏延進恃恩踰規廷  
奏之詔罷延進以鑑判三司度支憑由催欠司時三  
部各置憑由催欠請併為一從之王明李惟清薦其  
能用為江南轉運使豪富為民患鑑以名聞令部送  
魁首赴闕以三班職名羈縻之又建議置臨江軍時  
以為便召還特被慰獎命知梓州遷刑部員外郎判  
大理寺遷屯田郎中判三司都催欠司改都勾院擢  
拜樞密直學士知通進銀臺封駁司又掌三班上言

供奉官以下不考校殿最恐無沮勸即詔鑑兼磨勘  
職時改三司為左右計分天下為十道鑑奏其非便  
尋果復舊淳化中遣鑑與西京作坊使馮守規偕往  
屯西蜀召對後苑門面授方略鑑曰益部新復軍旅  
不和若聞使命驟至易其戎伍慮或猜懼請假臣安  
撫之名上稱善付空名宣頭及廷臣數人鑑與知益  
州張詠即遣部戍卒出境王繼恩麾下使臣亦多遣  
東還督繼恩輩分路討捕殘寇而鑑招輯反側事平



歸拜左諫議大夫戶部使會五路進討西夏令鑑乘  
傳往環州與李繼隆議護送芻糧入靈州及還疏言  
宜特垂詔旨無使重勞因茲首春俾務東作况靈州  
一方僻居絕塞雖西陲之舊地實中夏之蠹區不若  
以賜繼遷使懷恩奉籍稍息飛輓尋詔鑑專督軍糧  
饋運頗集真宗初遷給事中使如故咸平初改工部  
侍郎出知廣州居二年民脩其政績上請刻石三年  
移知朗州溪洞羣蠻數寇擾鑑召酋豪諭以威信皆

俯伏聽命徙知相州有芝草生於監牧鑑表其祥以  
為河朔弭兵之兆優詔答之景德初卒年五十八子  
士廉殿中丞士宋太子洗馬士程屯田員外郎

薛田字希稷河中河東人少師种放與魏野善第進士  
起家丹州推官李允正辟延州從事向敏中薦其材  
改著作佐郎知中江縣父喪會祀汾陰經度制置使  
陳堯叟奏起通判陝州還拜監察御史母憂會祀太  
清宮丁謂奏起通判亳州遷殿中侍御史權三司度

支判官改侍御史益州路轉運使民間以鐵錢重私  
為券以便交易謂之交子富家專其事數至爭訟田  
請置交子務以權出入後寇瑊用其議蜀人便之就  
除陝西轉運使進直昭文館知河南府復入為度支  
副使使遼還擢龍圖閣待制知天雄軍尋擢知開封  
府以樞密直學士知益州還為左司郎中知審刑院  
羌人內寇遷右諫議大夫知延州以疾徙同州又徙  
永興軍不行卒田性和厚以幹敏數為大臣所稱云

李興蒲州人咸平間契丹內侵真宗狩魏興以東班殿侍隨節度使康保裔提兵赴敵軍陷興死之詔其子桓為西班殿直累官皇城使賀州團練使

任福字祐之河東人僑開封咸平中補衛士由殿前諸班累擢遙郡刺史元昊拒命除莫州刺史嵐石隰州緣邊都巡檢使奏曰河東地界大河斥堠疎闊願嚴守備以戒不虞上善之移知隴州擢秦鳳路馬步軍副總管詔增陝西城壘器械四十日畢備領忻州團

練使為鄜延副總管管勾延州東路蕃部事尋知慶  
州兼環慶副總管聽便宜從事夏人寇保安鎮戎軍  
福與子懷亮姪堦成勗聲言巡邊召諸將牽制敵勢  
行至柔遠砦夜部分諸將攻白豹城漏未盡抵城下  
四面合擊平明破之縱兵大掠焚巢穴獲牛馬橐駝  
七千有餘平骨咩等四十一族以功拜龍神衛四廂  
都指揮使賀州防禦使改侍衛馬軍都虞候康定二  
年發涇原鄜延兩路兵西討詔福詣涇原會安撫韓

琦計事聞元昊謀寇渭州琦募敢勇萬八千人使福將之以耿傳叅軍事桑懌為先鋒朱觀武英王珪各以所部從福節制琦戒福等併兵自懷遠城趨得勝砦至羊牧隆城出敵後諸砦相距纔四十里道近糧便度勢未可戰則據險設伏待其歸邀擊之福引輕騎數千趨懷遠城捺龍川遇鎮戎西路巡檢常鼎劉肅與敵戰於張家堡南斬首數百夏人棄馬羊橐駝佯北懌引騎趨之福踵其後諜傳敵兵少福等頗易

之薄暮與懌合兵屯好水川觀英屯籠落川隔山五  
里約朔日會兵川口路既遠芻餉不繼士馬乏食已  
三日追奔至籠竿城北遇夏軍循川行出六盤山下  
距羊牧隆城五里結陣諸將方知墮敵計勢不可留  
遂前格鬪懌馳犯其鋒福陣未成列賊縱鐵騎突之  
自辰至午陣動衆傳山欲據勝地俄伏發自山背下  
擊士卒多墜崖壑相覆壓福力戰身被十餘矢小校  
劉進勸福自免福曰吾為大將兵敗以死報國爾揮

四刃鐵簡挺身決鬪鎗中左頰絕其喉而死懌肅英  
珪傳鼎柴贊王慶李簡李禹亨劉鈞及軍校數十士  
六千餘悉沒惟朱觀以兵千餘保民垣得全方元吳  
傾國入寇福臨敵受命所統皆非素撫士又分出趨  
利故敗特贈武勝軍節度使兼侍中賜第一區月給  
其家錢三萬粟麥四十斛追封母隴西郡太夫人妻  
琅琊夫人子懷亮亦死之錄少子及從子凡六人  
薛向字帥正顏孫任太廟齊郎為永壽主簿權京兆戶



曹遷邠州司法叅軍侍御史陳洎行邊向陳三弊言  
今板築暴興吏持斧四出伐木無間井閭丘隴民不  
敢訴必不得已宜且葺邊城函關秦東塞今西鄉設  
守是為棄關內乎三司貸龍門富人錢抑非義也洎  
上其說悉從之邠守治予城立表於市以撤屋力爭  
罷之監在京權貨務連歲羨緡錢當遷秩移與其兄  
三司判官董沔議改河北便糴行鈔法洎曰如此則  
都內之錢不繼茶鹽香象將益不售矣既而邊糴滯

不行汚坐黜以向知鄜州大水郡卒戍延安求歸視  
弗得皆亡奔而室廬盡沒聚謀為盜向遣吏曉之曰  
冒法以赴急人之常情而不聽若輩歸此武將不知  
變之過也亟往收溺尸貫汝擅還罪衆乃安又論河  
北糴法之弊以為度支歲費緡錢五百萬所得半直  
其贏皆入賈販家今當有以權之遇穀貴則官糴於  
澶魏載以給邊新陳未交則散糴價以救民乏軍食  
有餘則出倉收之此策一行穀將不可勝食矣朝廷

是向計始置便糴司於大名以向為提點刑獄兼其  
事武彊盜殺人而逸尉捕平民向覆其寃脫六囚於  
死入為開封度支判官權陝西轉運副使制置解鹽  
秦損畦夫數兼提舉買馬監牧沙苑養馬歲得駒三  
百而費錢四十萬占田千頃向請斥閒田予民置場  
於原渭以羨鹽之直市馬於是馬一歲至萬匹昭陵  
復土計費五十萬貫石三司將移陝西緣邊入鹽中  
於永安縣向陳五不可以為失信商旅遂舉所闕之

數以獻坐事罷知汝州甫數月復為陝西轉運副使  
進使厚陵役費助如永昭將漕八年入鹽馬芻粟數  
累萬民不益賦其課為最种諤往迎鬼名山詔向與  
議廷議劾諤擅興向言諤亡身以徇國有如不稱臣  
請坐之諤貶亦罷知絳州再貶信州移潞州張靖使  
陝西還陳向制置鹽馬之失詔向與辯靖辭窮即罪  
之神宗知向才以為江浙荆淮發運使綱舟利盜貨  
嘗假風水沈溺以滅迹向募客舟分載以相督察官

舟多冒占悉奪昇屬州諸運皆詣本曹受遣以地有  
美惡利有重輕為立等式用所漕物為誅賞遷天章  
閣待制上以向習知環慶地形召詣中書舊制發運  
使上計毋得出入至是弛其禁熙寧四年權三司使  
遷右諫議大夫河洮用兵向未嘗乏供給及解嚴疏  
乞裁濫員汰冗卒省浮費節橫賦手勅褒納進龍圖  
閣直學士遼人求代北地加樞密直學士給事中知  
定州高陽關募兵敵陰遣人應選向諜知之主者覺

縱使亡去遣邏捕取械送瀛州戮於市北使數出不遜語雲應點兵涿易治道向曰彼欲彊議速成故多張虛勢以撼我使者懼不如其請故肆嫚言以激倖取戍兵來不除道無能為也後皆如向言遷工部侍郎控辭用兩府制賜詔弗允元豐元年同知樞密院向幹局絕人尤善商賈計算無遺策用心至到御史數有言不聽以是益得展奮其材業論兵上前通暢明決遂得大用及在政地多言宜養威持重會詔民

畜馬向既奉令旋知民不便議欲改為舒亶論之斥  
知潁州又改隨州卒年六十六元祐中錄其言諡曰  
恭敏

穆衍字昌叔河中人第進士調華池令民牛為仇家斷  
舌訟於縣衍命殺之明日仇以私殺告衍曰斷牛舌  
者乃汝耶訊之具服後知淳化從韓絳宣撫陝西遇  
慶卒潰衍念母在耀亟謁歸信宿走七驛比至慶卒  
知行名不敢近時捕賊兵擅發常平倉衍曰饑之不

恤則吾兵將為慶卒矣衍考課為一路最元豐中叅  
种諤軍事諤第賞以死事為下衍曰此非所以勸忠  
也力爭之諤還入塞詔往靈武援渭慶兩軍衍曰吾  
兵未及解甲安能犯不測諤乃止同幕畏罪陽謝之  
衍識其意曰全萬衆之命以一身塞責衍無憾焉元  
祐初議棄熙蘭衍言蘭棄則熙危熙棄則關中震唐  
自失河湟警及長安至今二百餘年非神考英武孰  
能克復若一旦委之恐後患益前悔將無及矣議遂



止改陝西轉運判官金部戶部員外郎詔視熙河還  
言質孤勝如據兩川美田實彼我必爭之地自西關  
失利遂廢不守請界二壘之間城李諾坪以控要害  
及他城堡皆起亭障以通涇原明年遂城李諾名曰  
定遠三遷左司郎中紹聖初以直秘閣為陝西轉運  
使加直龍圖閣知慶州徙延安又徙秦州未行卒年  
六十三敕河中官庀其葬後追錄蘭州議官其一子  
薛嗣昌向子以吏材奮崇寧中歷熙河轉運判官梓州

陝西轉運副使直龍圖閣集賢殿修撰入為左司郎  
中擢徽猷閣待制陝西都轉運使知渭州改慶州坐  
事貶安化軍節度副使安置郢州起知相州復待制  
知太原府論築涇原三倉勞加顯謨閣直學士又以  
撫納西羌功進延康宣和殿學士拜禮部刑部尚書  
罷提舉崇福宮久之遷延康殿學士知延安府賜第  
汴京當遷官丐回授其子杲京秩降待制卒先是燕  
雲之役譚稹銜命訪諸帥而嗣昌乃潤飾諛詞云

邵雲河中龍門人建炎初從陝州石壕尉李彥仙守陝  
金人破城雲被執金將婁宿欲命以千戶長雲肆詈  
不屈釘之木架上置解州東門外惡少撫其背湟丈  
曰可鞘吾佩刀雲怒偃架仆之後五日磔解至抉眼  
摘肝詈不絕喉斷乃已初行刑將剗刀雲叱之失刃  
而斃其忠勇如此

薛季宣字士龍寶鼎人僑永嘉父徽言起居舍人季宣  
六歲而孤伯敷文閣待制弼收鞠之從弼宦游及見

渡江諸老聞中興經理大略喜從老校語得岳韓諸將兵間事甚悉年十七荆南帥辟書寫機宜文字獲事程頤弟子袁溉盡受其學於古封建井田鄉遂司馬法之制靡不研究講畫權武昌令白帥劉錡以武昌形勢直淮蔡而兵寡勢弱宜早為備錡不聽及金兵入稍稍資季宣計畫未幾詔成閔入援季宣又說宣諭汪澈曰閔既得蔡有破竹之勢宜守便宜勿遣而令其乘勝下潁昌道陳汝趨汴都金內顧且驚潰

可不戰而屈其兵矣。澈不聽。時江淮仕者皆預遣其  
孥。季宣獨留家。與民期曰：「吾家即汝家。即有急。吾與  
汝偕死。」民亦自奮。縣多盜。行保伍法。五家為保。二保  
為甲。六甲為隊。因地形便合為總。不以鄉為限。總首  
副總首領之官。族士族富族皆附保。蠲其身俾輸財  
供總之小用。諸總有圃。以習射。禁捕博雜戲。而許以  
武事角勝負。五日更至庭閱之。賞其尤者。不幸死。予  
棺復其家。三年鄉置樓盜發。伐鼓舉烽。瞬息徧百里。

縣治白鹿磯安樂口皆置戍復請得戰艦十甲三百  
羅落之守計定訖兵退人心不搖樞密使王炎薦於  
朝召為大理寺主簿未至為書謝炎言宜以仁義紀  
綱為本用兵請俟十年後宰相虞允文白遣行淮西  
收流民以實邊季宣為表廢田相原隰復合肥三十  
六圩立二十二莊於黃州以戶授屋以丁授田頒牛  
及田器穀種各有差廩其家至秋乃止凡為戶六百  
八十有五分處合肥黃州間並邊歸正者振業之季

宣嘗曰吾非為今日利也合肥之頻邊有警因以斷  
柵江保巢湖黃州地直蔡衝諸莊輯則西道有屏蔽  
矣光州守宋端友招集五戶而詭增之以幸賞季宣  
按得其實奏劾之下端友大理季宣還奏曰左右之  
人進言者其情不可不察也託正以行邪偽直以售  
佞薦進人物曾非誦言游揚中傷乃自不意一旦號  
令雖自中出而其權已歸私門矣故齊威之霸不在  
阿即墨之誅賞而在毀譽者之刑臣觀近政非烹阿

即墨之誅賞奈何毀譽之人自若乎上曰朕方圖之  
季宣又奏曰日城淮郡以臣所見合肥板幹方立中  
使督視卒卒成之臣行過郡一夕風雨墮城五堵漂  
陽南壁闕而居巢庫陋如故乃聞有靡錢鉅萬成城  
四十餘丈者陛下安取此然外事無足道咎根未除  
臣所深憂左右近侍陰擠正士而陽稱道之陛下儻  
因貌言而聽之臣恐石顯王鳳鄭注之智中也又言  
近或以好名棄士大夫夫好名特為臣子學問之累



人主為社稷計唯恐士不好名誠人人好名畏義何鄉不立上稱善恨得季宣晚遂進兩官除大理正凡奏請論薦皆報可虞允文不悅居七日出知湖州會戶部以歷什場務季宣奏曰自經總制立額州縣鑿空以取贏雖有奉法吏思寬弛而不得騁若復額外征其強半郡調度顧安所出殆復巧取之民民何以勝戶部譙責愈急季宣爭愈強臺諫交疏助之乃收前令改知常州未上卒年四十季宣於詩書春秋中

庸大學論語皆有訓義

金

陳揮其先自洛徙臨晉家貧嗜學擢賢良方正官滋州  
司士曹有清操子顯正大中擢賢良方正拜儒林郎  
卒於官孫克基天德三年進士第一官國子監丞克  
基子仲謙幼穎悟授書即能通大義舉賢良方正任  
耀州三白渠規措使謝病歸與名人高士從容觴咏  
之樂十餘年卒年六十一封潁川郡伯仲謙子賡河

東山西道行中書省叅議庾平陽路提舉學校廩近  
侍局奉御膺東平路觀農使膺子元凱元至元間明  
經官河東山西肅政廉訪使追封潁川郡侯諡宣靖  
元凱子敬立由明經累官開城路總管府治中陳氏  
七世舉明經者四人擢賢良方正者三人舉進士者  
一人科第蟬聯可謂盛矣

胡光謙河中府人明昌三年四月壬寅朔尚書省奏提  
刑司察舉河中府胡光謙年雖八十三尚可任用勅

召赴闕七月丁亥光謙至闕命學士院以雜文試之  
稱旨上曰朕欲親問之八月辛亥特賜光謙明昌二  
年進士第三甲及第授將仕郎太常寺奉禮郎官制  
舊設是職未嘗除人以光謙德行才能故特授之

侯小叔河東縣人為河津水手貞祐初籍充鎮威軍以  
勞補官元光元年遷府判官權河東南路安撫副使  
元兵圍河中盡護農民入城以家財賞戰士圍始解  
遷治中安撫如故樞密院奏小叔才能可用權位輕

不足威衆乞假符節詔權元帥左都監便宜從事提  
控吳德說小叔出降叱出斬之表兄張先復從容言  
出降保妻子怒謂先曰我舟人子致身至此何云出  
降縛於柱殺之飯僧祭葬以盡戚黨之禮頃之樞密  
院遣都監額掄來議兵事因出城會議石天應乘機  
取河中府作浮橋通陝西小叔駐樂李山寨衆兵畢  
會夜半砍城以登焚樓櫓火照城中天應大驚盡棄  
輜重牌印馬牛雜畜死於雙市門小叔燒絕浮橋撫

定其衆遷昭毅大將軍遙授孟州防禦使同知河中府事二年正月元軍十萬圍城總帥阿格遣提控孫昌率兵五千樞密副使完顏薩布遣李仁智率兵三千來援約夜中鳴鉦內外相應及期小叔出兵戰昌智仁不敢動復斂衆入城圍益急衆議出保山寨小叔曰去何之密遣經歷張思祖奔告於汴明日城破小叔死不得其屍或疑尚在中條諸寨無所統領後四十餘日乃詔河中推官嘉勒幹權領右都監總其

軍宣宗思小叔功下詔褒贈切責阿格不救河中之罪

強伸本河中射糧軍子弟貌寢陋而膂力過人興定初從華州副都統安寧復潼關有勞監郃陽醋後客洛下選充官軍戍陝鐵嶺軍潰被執從都尉烏凌阿呼圖克竄歸中京留守薩哈連死元帥左監軍任守真復立府事以便宜署伸警巡使守真又死鄭州天興元年八月中京人推伸為府簽事領軍二千五百人傷

殘老幼半之甫三日復被圍東西北三面多樹大砲  
伸括衣帛為幟立之城上募壯士得五千人赤身而  
戰往來救應大叫以惑子軍為號其聲勢與萬衆無  
異刮錢為鏃得元兵一箭截而為四以筒鞭發之創  
過敵砲能發大石於百步外所擊無不中伸奔走四  
應所至必捷得二駝及所乘馬皆殺之以犒軍士得  
一轡如賜百金九月元兵退百里外閏月復攻一月  
兵倍前不能拔事聞哀宗降詔褒諭以伸為中京留



守元帥左都監世襲穆昆行元帥府事二年二月建  
一堂於洛川驛之東名曰報恩刻詔文於石誓以死  
効三月中使至以伸便宜從事時行省色埒卒呼圖克  
代伸行總帥府事月餘糧盡軍民稍稍散去五月元  
兵復來陣於洛南伸陣水北有韓帥者匹馬立水濱  
招伸降伸責曰君獨非我家臣子耶既不能勤王乃  
欲誘我降耶我本一軍卒今貴為留守誓以死報國  
遂躍而射之帥奔陣率步卒數百奪橋伸軍一旗手

獨出拒之殺數人即手解都統銀符佩之士氣復振  
初築戰壘於城外四隅至五門內外皆有屏謂之迷  
魂牆元兵以五百騎迫之伸率部下二百鼓譟而出  
元兵退六月呼圖克走鷹揚都尉獻西門以降伸知城  
不能守率死士數十人突東門出轉戰至偃師力盡  
就執載以一馬擁迫而行宛轉不肯進強掖之及中  
京七里河將見大帥塔察語益激兵卒曰此人乖角  
如此其能降乎不若殺之因好語誘曰汝能北面一

屈膝吾貸汝命伸不從左右力持使北伸拗頭南向  
遂殺之

盧芝字廷瑞河東人任子補官以西安軍節度使行部  
尚書石玠字子堅河中人崇慶二年進士以汝州防  
禦使行部侍郎天興二年九月河南行省武仙由浙  
川至黑谷泊進退失據謀北走二人相與謀曰吾等  
知仙不卹國家久矣諫之不從去之未可事至今日  
正欠蔡州一死耳假若不得到蔡州死於道中猶勝

死於仙也既去仙始覺追玠殺之走至南陽為土賊所害

段元亨河中人提孤軍守城或誘其降不從城陷絙西南堞下死於河兄大亨為領軍都元帥亦死於難祀鄉賢

南仲蒲州人有孝行以孝廉稱元兵至先士卒死之元

謝天吉字鍾祥元初知蒲郡嘗因朝覲賜坐賜金甲彤

弓良馬貂裘金末人皆逃難河南天吉以王事持節  
至流民相謂謝帥素寬仁能容來附者數千人初遭  
上官徵斂無度輒罄家貲以應踰年徵益迫天吉以  
民困家竭計窮乃投河佯死事得寢時經大變河中  
又關河戎馬之區府僚故吏相對歔歔曰若謝帥在  
事不至此或曰謝帥實在向之死偽也諸同僚就謁  
於所隱既見悲喜交集懇求莅事再三後可百姓歡  
喜載道天吉善談笑好飲酒以舍醉養於萬固精舍

歸卒於家年五十九今子孫居嶷山前東莊村稱巨族焉

陳元凱字時舉膺子擢明經性英毅有操行事父母以孝聞至元間太保劉秉忠薦舉扈從上都歷建康路總管浙東海右道肅政廉訪使以疾終贈河東郡侯諡靖宣

劉哈喇巴圖爾河東人本姓劉氏世業醫至元八年以近臣言得召見世祖謂其目有火光異之留侍左右

初賜名哈喇鄂托齊十七年擢太醫院管勾宗王必喇特穆爾往征實里濟上問曰當行者多避事汝善醫復習騎射能從行乎曰事君不辭難臣不行將何為即請授甲上曰汝安用甲曰臣願備一戰士上曰醫汝事也甲不可得惟賜以環刀弓矢將行聞母疾歸省不敢以遠役告母微知之謂曰汝第行我疾安矣即辭去馳至王所及將戰請甲王留之使領輜重慨然曰大丈夫當効命行陣乃守營帳如婦人耶見

有甲者飲以酒高價取之明日披以往曰一人興善  
萬人可激我為萬人激耳中道三遇敵射之皆不中  
王喜甚既擒實里濟命獻俘上徹御膳羊哉以賜既  
拜受先懷其美者上問故對曰請以遺母命自今凡  
賜之食必先賜其母以功授和林等處宣慰副使二  
十五年海都犯邊尚書省奏以徹伯爾往掌和林屯糧  
上曰出納非徹伯爾所知哈喇鄂托齊可勝任遂使徹  
伯爾與俱會海都兵至與徹伯爾南行至巴爾布拉克地距



敵軍五六十里徹伯爾大懼劉哈喇見其有二心遂潛遁入見上喜曰人言汝陷賊乃能來耶二十七年遷河東山西道宣慰使奏曰河東臣鄉乞賜錦衣為榮上以金織文衣賜之居二年召還諭曰阿巴拉呼素產魚吾今立城名肇州汝往為宣慰使仍別賜汝名曰小龍兒或曰哈喇巴圖爾汝可自擇對曰龍非臣下所敢承上曰然則哈喇巴圖爾可也復賜以繡衣玉帶既至定市里安民居一日得魚九皆千斤遣使

來獻俄召還成宗初皇太后命曰東方汝嘗鎮之今以屬汝乃以為咸平宣慰使元正元年召為御史中丞道卒

敬儼字威卿河東人後徙易水曾祖于淵樂陵令祖鑑同知蒿州事皆以進士起家父元長太常博士儼幼嗜學御史中丞郭良弼薦為殿中知班著憲章若干卷選充中書省掾朱清張瑄為海運萬戶儼適典其文牘致厚賂拒之後二人誅儼獨無所與大德七年

拜監察御史江浙省與浙西憲交訐命與省臣阿爾  
斯蘭哈雅偕往治兩議上朝廷卒是儼議至大初擢南  
臺治書侍御史議立尚書省不便忤宰臣意左遷兩  
淮鹽運轉運使陰欲陷之儼黜貪理敝課復增羨河  
南省將以羨數為歲額儼謂病民為已非大臣體遂  
止仁宗初為戶部尚書言遽罷錢不用恐細民失利  
不從以疾辭皇慶二年除南臺侍御史不赴明年召  
為侍御史臺臣有劾去而復職者御史復劾命丞相

樞密共決儼曰如是則臺事去矣遂即帝前奏黜之  
延祐五年拜中書參知政事諸院寺監奏除僚屬富  
民多賂進儼奏請悉追奪著為令明年謝病歸泰定  
四年徵為集賢大學士商議中書省事帝親為差吉  
日使視事命朝會無下拜旋進平章政事復以老辭  
不從天曆改元廷議欲盡戮上都朝臣儼抗言若輩  
皆循歲例扈行殺之非罪衆賴以免居月餘告歸猶  
玩書不輟臨終戒子弟當守恒業無急仕進正冠幘

端坐而逝加封魯國公諡文忠叔祖鉉金進士元初  
為中都提學著春秋備忘四十卷仁宗命刻其書行  
世

王恩河中人知識明達勇力過人金末避亂鄜州元兵  
南下率衆投元四太子麾下遂命總歸附之衆凡遇  
攻戰屢有奇功授都元帥年九十三而終祀鄉賢

張克寬蒲州人以儒進拜南臺御史歷晉寧路總管所  
至有異政家中條山下號蒼陵翁同族張鏞至正間

為首陽書院山長以文學著聲

張瞻甫河東人至正辛巳仕潞州守興衰補弊政多可稱

何約字仲博河中人初授吏部主事歷監察御史戶兵二部尚書行省參知政事江西湖北河東憲使召拜內臺侍御史為上知遇致仕卒子孫貴顯為蒲大族歐陽泣為其父作神道碑

裴居敬字太簡河中人累官雲南行省參知政事積學

勵行家蓄書二萬餘卷卒贈陝西行省參知政事封  
河東郡公諡憲懿蕭軒為作神道碑祀鄉賢



山西通志卷一百二十四